

मीका

ब्रेक्ब मुर: मीका इस्राएल डा दक्खिन हेब्रोन नु गाजा सहर आस दाते मोरेशेथ डा मुर बाक्त। मेको आ नें आ अर्थ “परमप्रभु यावे खोदेशो सुइ मबाक्ब” देशो बाक्ब। मीका आमोस खोदेशो पा रू डा गेय पाइब बाक्त। मेको अस्सुर डा लडाइ पाइब आन डोंइती रे प्रोक्शा, यरूसलेम सहरम परमप्रभु यावे आ लोत्र पशो बाक्त। एको किताब मीकामी ब्रेक्शो बाक्त।

गेना ब्रेक्शो: मीकामी ७५०-७२३ बि. सी.म परमप्रभु यावे आ लोत्र पशो बाक्त। मेकोमी सामरीया खतम दुम्चा क्येडा डोंइती मेको आ पर्बम परमप्रभु आ लोत्र पशो बाक्त। मीका १:६ हिज्कीयाह पिप दुम्शो ६ बर्स दुम्ची ना ७२२ बि. सी. सामरीया खतम दुम्शो आ पर्बम चहिं मीकामी मारेइ मब्रेक्शो बाक्त। मोपतीके मेकोमी एको किताब ७२२ बि. सी. क्येडा डोंइती ब्रेक्शो बाक्त।

मार ब्रेक्शो: परमप्रभुमी थुं नाइक्चा गेब। इस्राएल नु रागी रागी डा मुर नेल्ल आन कली मस्सीह सोइक्ब। मेकोमी आ गे जाक्ब मुर आन कली श्येत रे प्रोंइब।

सामरीया नु यरूसलेम कली निसाफ

1 परमप्रभु यावेमी मोरेशेथ डा मीकाह कली लोत्र पाप्तु। मेना यहूदा रागीमी योथाम पिप बाक्त। मेको आ नोले आहाज नु मेको आ नोले हिज्कीयाह पिप दुम्ताक्स। मिनु मेको परमप्रभु यावे आ लोत्र नु आ कोंइतीके सामरीया नु यरूसलेम आस पर्बम बाक्त। येरमीया २६:१८; यसैया १:१

2 मिनु परमप्रभु यावेमी मार कोंइशो नु देशो बाक्त देशा हना “जात जात डा मुर, गे नेल्लेमी नोफा दाइक्तीन। रागी नु मेकेर

बाक्ब नेल्लेमी नेनीन। परमप्रभु, परमप्रभु यावे आ बाक्तीके रे पा इन मरिम्शो पशो आ पर्वम सांकछी दुम्ब।

3 लो कोवडीन, परमप्रभु यावे आ बाक्तीक रे जाक्ना जाक्न बाक्ब। मेको यीब नु रागी डा लाइशो डांडाम गाक्ब। आमोस ४:१३

4 मी आ नेक्था मयीन यशो खोदेशो पा, लुकच लतीकेमी ब्वाक्कु शाइशो खोदेशो पा, मेको आ थेक्शो डांडापुकी याइनीम। मिनु दिंमपुकी ब्रोल्नीम।

5 मेको नेल्ल याकूब आ मरिम्शो पशो नु इस्राएल डा मुर आन पाप आ पर्वम दुम्शो बाक्ब। याकूब आ मरिम्शो पशो मार बाक्बा? मेको सामरीया ममाइ डा? यहूदा डा लाइशो डांडा मार बाक्बा? मार, मेको यरूसलेम ममाइ डा? येरमीया २३:१३-१४

6 मोपतीके गो सामरीया कली फुल्लु तेल्लीक सेल्लुड। मेको अडगुर खुम्तीक रू दुम्ने चाप्ब। गो मेकेर डा फुल्लु दिंमम ताइक्नुड। मिनु मेको आ खिं प्रेशा, आ जग गुंडनुड। १राजा १६:२४; होसे १४:१

7 मिनु मेको आ मूर्ति नेल्ल प्रोल्चा पुंडसीनीम। मेको आ गेय पा चेम्शो क्येट नेल्ल मीम हुम्चा पुंडसीब। गो मेको आ मूर्ति नेल्ल खतम पोक्नुड। मारदे हना मेको नेल्ल तेल्लेम पा चेम्शो क्येट खोदेशो पा खुप्शो बाक्नीम। मोपतीके मेको तेल्लेम पा चेम्शो क्येट खोदेशो पा जाम्शा लाइनीम” देंत। होसे २:७,१४

यहूदा सहर कली श्येत दुम्ब

8 मिनु गो मेको आ पर्वम रोंका पा डाक्ना डाक्न बाक्नुड। श्येत्थ खोइल नु भेत्रे गाक्नुड। गो सिवार खोदेशो पा ग्रीनुड। मिनु बुक्स खोदेशो पा ग्रीनुड।

9 मारदे हना मेको आ गार मसाब। मेको यहूदा सम्म जाक्शो बाक्ब। मेको आं मुर आन बाक्तीक यरूसलेम सहर डा ठेयब लाप्चो सम्म जाक्दीशो बाक्ब।

10 एको लोव्र गाथ सहरम मनेंपतीन। मिनु डाक्सीन मडाक्कीन। बेथ-लेआफ्रामी इन पियाम फुरक फुंडसीन। २सामुएल १:२०

11 शाफीर सहर डा मुरपुकी, भेत्रे दुम्शा, मुने दोक्शा इन लां लने। सानान सहर डा मुरपुकी लाडगा मग्रूनीम। बेथ-एचेलम डा मुर रोंका पाइनीम। मुल रे इ कली वारच पाइब मबाक्नीम।

12 मिनु मारोथ सहर डा मुरपुकीम हिंना हिंन रिम्शो दुम्तीके रिम्ना रिम्न बाक्नीम। परमप्रभु यावे रे हिंचा डा श्येत यित। मिनु मेको यरूसलेम डा ठेयब लाप्चो सम्म जाक्शो बाक्त।

13 लाकीश सहर डा मुरपुकी, शारा आन कली बग्गीम फ्रेंशा लने। गे सियोन सहर डा मुर आन कली पाप पपाइक्तीनी। मिनु मेको कली पाप पपाइक्ब, गे बाक्नीनी। इस्राएल आ मरिम्शो पतीके इन दातेम थीसीब।

14 मोपतीके गे मोरेशेथ-गाथ सहर कली आ गाक्ची ना डा कोसेली गेचा माल्नीनी। अकजीब सहर डा मुर इस्राएली आन पिप आन कली ब्वाक्कु मबाक्तीकेम ब्वाक्कु बुक्शो खोदेशो बाक्नीम।

15 मिनु मारेशा सहर डा मुरपुकी, गो इन कली ग्रापाइक्चा कली मुर का चाक्नुड। मेको इस्राएल डा मान ततीके अदुल्लाम सम्म जाक्ब।

16 मिनु इन दाक्शो आल आन पर्बम इन चां प्रेक्कीन। चां नेल्ल प्रेक्शा, गिदद खोदेशो दुमीन। मारदे हना इन आल नेल्ल ग्याइश्शा, मुर आन रागीम लाइक्चा पुंडसाक्म।

2

मरिम्शो ठेयब मुर आन पर्बम लोव्र

1 आबी आबी, सु सुम आन ब्राख्येम गोलशा पाप नु मरिम्शो पचा ला मिम्नीमी। मिनु नां सोव्रम चोटीन मेको आन मिम्शो पाइनीम। मारदे हना मेको पने चाप्ब बाक्नीम।

2 मेकोपुकीम रिम्शो रू तशा वाल्शा, रोइक्नीम। रिम्शो खिं रोइक्नीम। मोपा मेकोपुकीमी मुर आन खिं नु आन थेरशो रू आंम के सेल्नीम। ब्यवस्था ५:२१; हितोपदेस २४:१५; यसैया ५:८

3 मोपतीके परमप्रभु यावेमी मार देंत देंशा हना “गो मेको आन खिं डा मुर आन कली श्येत गेनुड। मेको रे आंम कली प्रॉइने मचाप्नीम। ठेयब लेशशा गाक्ने मचाप्नीम। मारदे हना मेको थम श्येत जतीक नाक्त बाक्ब। आमोस ५:१३

4 मेको नाक्ती मुरपुकीमी इन पर्बम शुक्शी पा कुम्सो पाइनीम। मिनु इन पर्बम रोंका पा डाक्नीम। मिनु मुरपुकीमी ‘गोपुकी थमा पा खतम दुम्तक। आंइ मुर आन थेरशो रू अर्को मुरुम लाइक्नीम। आंइ रू आंइ जोरी सत्रु आन दातेमी योक्सीनीम’ देंनीम” देंत।

5 मोपतीके गोपुकी परमप्रभु यावे आ मुर आन योक्शो रू रोइक्चा मताइनीनी।

6 मेकोपुकीम “परमप्रभु यावे आ लोव्र मपने” देंनीम। तन्न लोव्र पाइनीम। मिनु मेकोपुकीमी “मोदेशो श्येत आंइ कली मदुम्ब” देंनीम। आमोस ७:१६

7 याकूब आ खिं डा मुरपुकी, मोदेशो देंचा दुम्बा? मार, परमप्रभु यावे आ फाल्तीक सक्ति नुम्मे डा? मेकोमी मोदेशो पाइबा डा? परमप्रभु यावेमी रिम्शो पाइब आन कली रिम्शो लोव्र मपाइबा डा? आमोस ६:३

8 तन्न गे आं मुर आन डोंइती जोरी सत्रु खोदेशो दुम्शा बाक्नीनी। रिम्शो पाइब मुर आन फेक्तीक रोइश्शा लाइक्नीनी। लडाइ मदुम्शो बाक्ब, दे इन कली थमा सुइश्शा गाक्ब आन कली मोदेशो पाइनीनी।

9 गोपुकीम आं मुर आन मीश आन कली आन दारशो खिं रे ग्रुंइनीनी। मेको आन आलपुकी रे आं गेशो आसीक गेना हना यो कली रोइश्शा लाइक्नीनी।

10 बोक्शा लने। मारदे हना एकेर इन नाइक्तीक ममाइ। मारदे हना एको ग्रांग्रा दितीकेमी मुर आन कली मरिम्शो सेल्ब। मेको मारेइ पने

मचाप्या डा पा खतम सेल्शो बाक्ब।

11 तेकोइ मुरुमी जोल पा दूली लोव्र पशा “गो इ कली अडगुर शांबु तूचा नु रकसी तूचा आ पर्बम लोव्र पाइनुड” देंत हना, मेको मुर मेको आन कली गारचा डा लोव्र पाइब बाक्ब।

श्येत रे प्रोंइशो

12 परमप्रभुमी “याकूब गो थमा पा नेल्ल इन कली खुपशा पुक्नन्नी। गो इस्राएलम लीशो आन कली थमा पा खुपुडमी। गो मेको आन कली भेडा बगालम वोइशो खोदेशो पा नु योव्रतीकेम योव्रशो खोदेशो पा वोइक्नुड। मिनु मेकेर शुश मुर दुम्नीम। येरमीया ३१:१०; इजीकीएल ३६:३७; यसैया ५२:१२

13 लां कोंइब मेको आन डोंइती गाक्ब। मेकोपुकी लाप्यो रे पा ग्रूशा गाक्नीम। मेको आन पिप मेको आन डोंइती गाक्ब। परमप्रभु यावे मेको आन डोंइडोंइती बाक्ब” देंत।

3

ठेयब मुर आन कली हुइशो

1 मिनु गो “गे, याकूब आ ठेयब मुरपुकी नु इस्राएली आन खिं डा हुकुम पाइबपुकी, इन नोफा दाइशशा नेनीन। गो ठीक निसाफ तुइक्चा ममाल्नीनी डा? येरमीया ५:५

2 गेपुकी रिम्शो पचा काइ मदाक्नीनी। मिनु मरिम्शो पतीक दाक्नीनी। गेपुकीमी आं मुर आन कुशुल उक्नीनी। मिनु मेको आन रुश रे आन श्ये रिक्नीनी।

3 गेपुकीमी आं मुर आन श्ये ब्वाइतीनी। मेको आन कुशुल उक्तीनी। मिनु रुश टुक्रा टुक्रा पा जिक्तीनी। मिनु बोसुम क्येतीक श्ये खोदेशो पा मेको आन कली टुक्रा टुक्रा पा चेक्तीनी” देंती।
भजन संग्रह १४:४

4 मिनु मेकोपुकीमी परमप्रभु यावे कली पुंडनीम। तन्न मेकोमी मेको आन पुंडशो लोव्र मलेप्ब। आ अरेशो मटितीके मेकोमी मेको आन क्येडा आ कुल खुइक्ब। हितोपदेस १:२८; इजीकीएल ८:१८

5 मिनु परमप्रभु यावेमी आ लोव्र पाइब आन पर्वम मार देंत देशा हना “सुम आं मुर आन कली दूली लांम गाक्पाइक्बा? आं लोव्र पाइबपुकीमी, सुमी मेको आन कली जचा गेमेनु ‘रिम्शो दुम्ब’ देंनीम। तन्न मेको आन कली जचा मगेमेनु, मेको आन कली लडाइ तोचा कली ठीक दुम्नीम।

6 मोपतीके इन कली मारेइ मततीक नाक्दो दुम्ब। परमप्रभु रे मारेइ मतुइक्चा डा पा छिडछिड दुम्नीनी। आं लोव्र पाइब आन कली नां रिक्ब। मिनु नाक्त मेको आन कली छिडछिड दुम्ब।

7 कोइतीक ताइबपुकी शिशी मताइनीम। टुना मुना पाइबपुकी मुने दोक्नीम। मेको आन शोव्र सुम्सीचा माल्नीम। मारदे हना परमप्रभुमी मेको आन कली लोव्र मलेप्ब। आमोस ८:१२

8 तन्न गो सक्ति पाइश्शो बाक्नुड। गो परमप्रभु यावे आ सोक्ती, ठीक निसाफ पतीके नु आ सक्तिम ब्रीशो बाक्नुड। गो याकूब आ हेंथे पशो नु इस्राएल डा मुर आन पाप शेंचा कली मोदेशो दुम्शो बाक्नुड। यसैया ५८:१

9 याकूब आ खिं डा ठेयब मुरपुकी नु इस्राएल डा खिं खिं डा हुकुम पाइबपुकी एको लोव्र नेनीन। गेपुकीमी ठीक निसाफ पतीक कली ग्रांग्रा दीनीनी। मिनु ठीक लोव्र नेल्ल दूली सेल्नीनी।

10 गेपुकीमी हुश शाइक्पाइश्शा सियोन कली सेल्नीनी। मिनु यरूसलेम कली मरिम्शो पतीकेम सेल्नीनी। हबकुक २:१२

11 मेकेर डा ठेयब मुरपुकीमी घूस जशा निसाफ पाइनीम। मेकेर डा चढेबपुकीम शेंशो डा क्येट ताक्नीम। परमप्रभु यावे आ लोव्र पाइबपुकी क्येट तचा कली नोले दुम्ब लोव्र पाइनीम। मो हना यो मेकोपुकीमी ‘परमप्रभु यावे आंइ दातेमी बाक्ब। गो श्येत मजाइनीकी’ देंनीम। येरमीया ७:४

12 मोपा इन पतीके सियोन वाक्शो रू दुम्ब। यरूसलेम ब्रेशशो खिं डा फुल्लु देलतीके दुम्ब। परमप्रभु यावे आ खिं डा डांडा ब्वाकी दुम्शो बाक्ब” देंत। भजन संग्रह ७९:१; येरमीया ९:१०; येरमीया २६:१८

4

परमप्रभु आ डांडा

1 मिनु नोले डांडा नेल्ल आन क्येडा परमप्रभु यावे आ खिं बाक्शो डांडा लाइशशो दुम्ब। मिनु मेको नेल्ल आन क्येडा ग्येत्थ लाइब बाक्ब। मिनु शुश मुर मेकेर लाइनीम। यसैया २:२-४

2 मिनु रागी रागी डा मुरपुकी मेकेर जाक्शा, मेकोपुकीमी “जाक्कीन। गोपुकी परमप्रभु यावे आ डांडा लय। याकूब आ परमप्रभु आ खिं लय। मेकोम इं कली आ लां कोंइब। मिनु गोपुकी मेको आ लांम गाव्ने चाप्यल। मारदे हना शेंतीके सियोन रे नु परमप्रभु यावे आ लोत्र यरूसलेम रे गूब” देंत। लूका २४:४७

3 मेकोमी शुश जात डा मुर आन दातेमी निसाफ पाइब। मिनु डोन बाक्शो बोल्यो रागी रागी डा मुर आन कली निसाफ पाइब। मिनु मेकोपुकीमी आन तरवार चेम्शा, फाली सेल्नीम। आन तूतीक भाला चेम्शा गुये सेल्नीम। मिनु रागी रागी डा मुर आन दातेमी लडाइ मपाइनीम। मेकोपुकीमी गेनायो लडाइ मशेंसीनीम।

4 तन्न मुर नेल्ल आन अडगुर नु फोत्रशी रवा आन पुंम नित्नीम। मिनु मेको आन कली सुइमी हिंच मकोंइनीम। मारदे हना मुर नेल्ल आन परमप्रभु यावेमी लोत्र पशो बाक्ब। १राजा ५:५; जकरिया ३:३०

5 मिनु “जात जात डा मुर नेल्ल आन देवी देवता आन नेंम गाक्नीम। तन्न गोपुकी चहिं गेना हना यो परमप्रभु यावे, इं परमप्रभु आ नेंम गाक्नय” देंतेक्म।

परमप्रभु आ मुरपुकीम शिशी ताइनीम

6 परमप्रभु यावेमी मार देंत देशा हना “मेको नाक्ती गो खोइल मदुक्ब आन कली खुप्नुडमी। मिनु गो खेरशो नु श्येत जशो आन कली खुप्नुडमी। येरमीया ३१:८; ब्यवस्था ३०:४

7 मिनु खोइल मदुक्ब आन कली लीशो मुर आन दातेम वोइक्नुड। खेरचा पुंइसीशो आन कली बोल्यो रागी डा मुर सेल्लुडमी। मिनु परमप्रभु यावेमी मेको आन कली सियोन डांडा रे गेना हना यो कली सासन पाइब।

8 आं बगाल बाक्तीक डांडा, सियोन आ तमी इ सांद मिगदाल-एदेर सहर सम्म जाक्दीप्ब। गे डोंइती डा राज्य लेंशा ताइनेवे। यरूसलेम डा तमीम आ राज्य लेंशा ताइब।

9 मुल गे मारदे वाइ ब्रेशशा ग्रीनेवे? मार इ पिप मबाक्बा डा? इ अर्ती गेब जाम्शा लमा? मिनु मारदे आल थितीक रोइ पशो मीश मुर खोदेशो पा वाइ ब्रेत्नेवे? येरमीया ८:१९

10 सियोन आ तमी, आल थितीक रोइ पशो मीश मुर खोदेशो पा वाइ ब्रेशशा ग्रीडो। मारदे हना मुल गे एको सहर प्रॉइचा माल्नेवे। मिनु खिं मबाक्तीकेमी बाक्तीक सेल्चा माल्नेवे। गे बेबीलोनम लचा माल्नेवे। मिनु मेकेर रे प्रॉइचा पुंइसीनेवे। मेकेर परमप्रभु यावेमी इ कली इ जोरी सत्रु आन गुइ रे प्रॉइब।

11 मुल शुश रागी रागी डा मुर इ पबर्म दूली पा बोक्शा ‘सियोन ग्रांघ्रा दिशो दुम्ल। गो मेको कली कोव्रना कोव्रन बाक्चा तांडसेक्ल’ देंनीम” देंत।

12 तन्न मेकोपुकीमी परमप्रभु यावे आ मिम्शो मतुइक्नीम। मेकोपुकीमी आ पचा चिक्शो मतुइक्नीम। परमप्रभुमी मेको आन कली खला डा अन्न खुप्शो खोदेशो पा खुप्ताक्व।

13 सियोन आ तमी बोक्शा, अन्न तुपो। मारदे हना गो इ प्रोव्र फलाम के सेल्लुड। गो इ गेंग्रे कांसा के सेल्लुड। मिनु गे शुश जात जात डा मुर आन कली फस पोक्नेवे। मेको आन रोइशो परमप्रभु यावे कली गेनेवे। मिनु मेको आन शोंप रागी नेल्ल डा परमप्रभु यावे कली चढ़ेनेवे।

5

बेथलेहेम रे सासन पाइब का जाकब

1 गे गारो हिरशो सहर बाक्नेवे। लडाइ पाइबपुकीमी इ कली पुम्नीम। मिनु इस्राएल कली सासन पाइब कली कोक्केम चोत्रचोम तुप्नीम। उत्पत्ती ३५:१९; मत्ती २:५-६; यूहन्ना १:१-२

2 तन्न गे बेथलेहेम एफ्राथाह, गे यहूदा डा सहर आन दाते डा आइक्च बाक्ते हना यो, इ रे पा आं पा डा इस्राएल कली हुकुम पाइब का जाकब। मेको साइ डोंइती रेन बाक्शो बाक्त। यसैया ४:१७; यसैया ११:१२

3 मिनु परमप्रभु यावेमी इस्राएली आन कली काइ मकोत्रब। मिनु मीश मुरुमी आल थिवा नोले ला कोत्रब। मेना लीशो मुरपुकी इस्राएल डा मुर नु गारशा, लेत्चा पुंइसीनीम। इजीकीएल ३४:२३

4 मिनु मेकोमी परमप्रभु यावे आ सक्तिमी आ बगाल आन कली योत्रब। मिनु मेकोमी आ परमप्रभु यावे आ ठेयब नेंमी आ गेय पाइब। मिनु मेकोपुकी रिम्शो पा बाक्नीम। मारदे हना मेको रागी डा सुर सम्म नेल्ल क्येडा ठेयब दुम्ब। यसैया ९:५; एफिसी २:१४

5 मिनु मेकोमी थुं नाइक्चा गेब। मिनु अस्सुर डा मुर इं रागी ओत्रशा लडाइ पचा गोम्तेक्म हना, गोपुकीमी ७ जना गोठला नु ८ जना हुकुम पाइब वोइक्नीकी।

6 मेकोपुकीमी अस्सुर रागी कली तरवारम हुकुम पाइनीम। निम्नोद रागी कली शोइश्शो तरवारमी हुकुम पाइनीम। मिनु मेकोपुकीमी इं कली “अस्सुरी इं रागी ओत्रतेक्म हना यो, इं कली प्रोंइनीम। इ रागी डा सांदम जाक्तेक्म हना यो, इं कली प्रोंइनीम” देंनीम। भजन संग्रह ११०:३

7 याकूब आ लीशो मुर शुश आन दातेम परमप्रभु यावे रे जाक्शो सीत नु घांस तार जुक्शो रेउ खोदेशो दुम्नीम। मेकोमी “सुइ मुरुम वारच पाइनीमी कों” दे मकोत्रनीम। मिनु मुर आन आस मपाइनीम।

8 याकूब आ लीशो मुर शुश आन दातेमी ब्वाकी डा गुप्स खोदेशो दुम्नीम। मेकोपुकी भेडा गोठम बाकशो गुप्स आ चाइक्ब खोदेशो दुम्नीम। गुप्स मेकेर लाम्तेक्म हना, साइशशा ब्वाइनीम। मिनु सुइमी मेको आन कली प्रॉइने मचाप्नीम।

9 मिनु परमप्रभु यावेमी “गे इन गुइ इन जोरी सत्रु क्येडा बोल्यो दुम्शा ग्रानीनी। मिनु इन जोरी सत्रु नेल्ल खतम दुम्नीम। जकरिया ९:१०

10 मेको नाक्ती गो इन शारा इन दाते रे खतम पोक्नुड। इन बग्गी प्रेशशा गेनुड।

11 गो इन रागी डा सहर नेल्ल खतम पोक्नुड। गो इन बोल्यो दरवार नेल्ल प्रेतनुड।

12 गो इन टुना मुना पशो आ पर्बम इन कली खतम पोक्नुड। मिनु इन दातेमी साहीत कोव्रब आन कली बाक्चा मगेनुड। जकरिया १३:२

13 गो इन दाते डा मूर्ति नेल्ल खतम पोक्नुड। इन पूजा पचा कली खुक्शो फुल्लु खतम पोक्नुड। मिनु इन गुइमी सेल्शो थोव्रक आन डोंइती मबाप्नीनी।

14 गो इन दाते डा मूर्ति पाइशशो थाम तुल्शा बेरपाइक्नुड। मिनु इन सहर आन कली प्रेतनुड।

15 गो गाइशशा चुरशा रागी रागी डा मटीब मुर आन कली क्येक्क लेत्नुडमी” देंत।

6

परमप्रभु पाप आ पर्बम गाइशशो

1 परमप्रभु यावेमी मार देंबा, इन नोफा दाइशशा नेनीन “बोक्कीन। मिनु पहाड आन डोंइती इन देंचा माल्शो लोव्र शोव्रडीन। मिनु डांडापुकीमी इन लोव्र नेन्मेक्ल। इजीकीएल ६:२

2 गे डांडापुकी नु गेना हना यो लीब रागी डा जग, परमप्रभु यावेमी दोपा निसाफ पाइबा, मेको नेनीन। मारदे हना मेकोमी आ मुर आन

कली निसाफ पचा चिक्शो बाक्ब। आ दोस गेशो नोफा दाइशशा नेनीन। मारदे हना आ मुर आन कली मेको के लोत्र बाक्ब। मेकोम इस्राएल कली निसाफ पाइब।

3 आं मुरपुकी गो इन कली मार पडा? गो इन कली मार श्येत गेडा? आं कली देनीन। येरमीया २:५

4 गो इन कली इजीप्त रे एक चाक्तन्नी। मिनु इन वाइलीम वाइल दुम्शो रागी रे प्रोंइतन्नी। इन कली लां कोंइचा कली मोसा, हारून नु मिरयाम आन कली सोइक्ताक्डमी। प्रस्थान १५:२०

5 आं मुरपुकी, मोआब डा पिप बालाकम मार सल्ला पशो बाक्मे, मेको मिम्तीन। बेओर आ तौ बालाममी मेको कली मार लोत्र लेत्ता, मेको मिम्तीन। शित्तीम रे गिल्गाल सम्म डा लांमी गाक्शोनु, मार मार दुम्मे, मेको मिम्तीन। मिनु परमप्रभु यावेमी इन कली दोपा प्रोंइशो बाक्मे, मेको तुइक्नीनी” देंत। गन्ती २२:-२४:-; यहोसु २:१; यहोसु ४:१९

6 गो मार कुरशा परमप्रभु यावे आ डोंइती जाक्डा? मार चाक्शा, इर डा परमप्रभु आ डोंइती बाम्डा? मार चोशा चढ़ेतीक चाक्शा, आ डोंइती जाक्डा? मेको आ डोंइती बर्स का दुम्शो ब्यफ चाक्शा, जाक्डा? भजन संग्रह ५०:८-१३; आमोस ५:२२

7 परमप्रभु यावे हजार हजार सांड तशा ग्येरबा? मार १० हजार तेल के खोला तशा ग्येरबा डा? गो आं पाप आ पर्बम आं डोंइती जरमेशो तौ गेचा माल्नुडा? मिनु आं थुं डा पाप आ पर्बम आं आल गेचा माल्नुडा?

8 परमप्रभु यावेमी इन कली, गे बेक्शा लाइब मुर, इन कली मार रिम्शो बाक्मे नु मार पचा माल्नीनी, मेको देंशो बाक्ब। मार देंशो बाक्ब देंशा हना, गे ठीक निसाफ पने, शिशी पतीक कली दाक्तीन। मिनु इन परमप्रभु आ डोंइती ब्रेम्शो दुम्शा गाक्कीन। ब्यवस्था १०:१२; १सामुएल १५:२२

यरूसलेम कली दोस गेशो

9 परमप्रभु यावेमी सहर कली “आं कली मान पा हिंचा इन कली श्येत रे प्रौइतीक दुम्ब। गे थर डा मुर नु सहर डा गुम्तीक डा मुर आन लोव्र नेनीन।

10 गो मेको आ अरेशो मटीब आ खिं डा मरिम्शो पा चेम्शो शोंप प्रेंदु? इन आइक्च सेल्शो सराप रशो पुक्तीक प्रेंदु? लेवी १९:३५

11 मार गो इन मरिम्शो नाक्तीक नु जोल पा नाक्तीक ढक के थैलो वोइक्ब कली दोस मताइब सेलु? हितोपदेस २०:१०

12 मेको आ शोंप पाइशो मुरपुकी हुश खाक्श पोक्तीकेम ब्रीशो बाक्नीम। मेको सहर डा मुरपुकी जोल पाइनीम। मेको आन शोव्र जोल पतीकेमी ब्रीशो बाक्ब।

13 मोपतीके गो इ कली खतम पोक्चा गोशो बाक्नुड। गो इ कली इ पाप आ पर्बम श्येतथ पोक्नुड।

14 गे जचा थोव्रक जाइनेवे, तन्न मरूनेवे। मिनु इ कोव्रज शोव्रलु बेक्शोन बाक्ब। गे खेक्चा दा खेक्नेवे, तन्न उप्शा वोइक्ने मचाप्नेवे। गे मार खेक्नेवे, मेको नेल्ल लडाइम खतम दुम्ब।

15 गे मार मार शोक्चा दा शोक्नेवे। तन्न खुप्चा मताइनेवे। तेल रवा आ फल खाक्चा दा खाक्नेवे, तन्न इ रांम तेल खेक्चा मताइनेवे। गे अडगुर खाक्चा दा खाक्नेवे, तन्न अडगुर शांबु तूचा मताइनेवे। ब्यवस्था २८:३८-४०; आमोस ५:११

16 गे ओम्नी आ अरेशो लोव्र पाप्तीवी। मिनु आहाब आ खिं डा मुर आन पशो नेल्ल पाप्तीवी। मिनु मेको आन गेशो अर्ती टिप्तीवी। मोपतीके गो इ कली खतम पोक्नुड। मिनु इ मुर आन कली शुक्शी पतीक सेल्लुड। गे आं मुर आन गाइशो ताइनेवे” दे ब्रेन्न ब्रेन्न बाक्ब। १राजा १६:२९-३३

7

इस्त्राएल कली श्येत दुम्शो

1 गो दोदेशो पा श्येत जशो बाक्नुडा? गो फल सिशशा नोले, अडगुर रू डा सिला माल्ची नोले मारेइ जचा मताइनुड। आं माल्शो डोंइती मीशो फोव्रशी यो मबाक्ब। भजन संग्रह १२:२; यसेया ५७:१

2 थमा सुइक्चा पुंइसीब मुर रागी रे जाम्शा लाम्तेक्म। मिनु गेना हना यो रिम्शो पाइब मुर मलीशो बाक्नीम। मुर नेल्ल मुर साइक्चा कली बाप्शा बाक्शो बाक्नीम। मुर नेल्लेमी ब्वारद दाइशशा आंम लोकब कली साइक्चा माल्शो बाक्नीम।

3 मेकोपुकी मरिम्शो पचा कली जोक्ब बाक्नीम। आन ठेयब मुर नु निसाफ पाइबपुकीमी घूस जाइनीम। सक्ति पाइशशोपुकीमी मार मिम्तमे मेकोन पाइनीम। मौपा ठीक पतीके कली दूली सेल्नीम।

4 मेको आन दाते डा नेल्ल क्येडा रिम्शो मुर चू रवा खोदेशो बाक्ब। मेको आन दाते डा गेना हना यो रिम्शो पाइब थरपु हिरशो चू खोदेशो बाक्ब। इन खाल पाइब आन नाक्त जाक्शो बाक्ब। मेको नाक्ती इन कली कोव्रबमी इन कली गुम्थ जाक्ब। मुल मेको आन कली खतम सेल्तीक नाक्त जाक्ब।

5 इन वारच कली थमा मसुतीन। इन दाक्शो मुर कली थमा मसुतीन। गे नु काथा इप्शो मीश नु यो होस पा लोव्र पने। येरमीया ९:३-४

6 मारदे हना तौमी आ आफ कली मरिम्शो पाइब। तमी आ ममा आ पर्बम दूली पाइब दुम्ब। चाइमीम आ शिमी आ पर्बम मरिम्शो पाइब। आंम खिं डा मुर इन जोरी सत्रु दुम्नीम। मत्ती १०:३५-३६

7 तन्न गो परमप्रभु यावे गे कोव्रनुड। गो आं कली श्येत रे प्रोंइब परमप्रभु कली रिम्नुड। आं परमप्रभुमी आं पुंइशो नेंब।

परमप्रभुमी श्येत रे प्रोंइब

8 मिनु “आं जोरी सत्रु आं कली शुक्शी पा मग्येरसीन। गो गोल्टी हना यो, बोक्नुड। गो छिडछिडम बाक्ती हना यो, परमप्रभु यावे आं छेडछेड बाक्ब। ओबदिया १:१२; भजन संग्रह २७:१

9 आं कली निसाफ पा वारच मपवा सम्म गो परमप्रभु यावे आ गाइश्शो फाल्चा माल्नुड। मारदे हना गो मेको कली पाप पाता। मेकोमी आं कली आ शिशी तपाइक्चा कली छेडछेडम ग्रुंडब। येरमीया १४:७

10 मेना आं जोरी सत्रुम मेको ताइनीम। मिनु मुने दोक्नीम। मारदे हना मेकोपुकीमी डोंइती 'परमप्रभु यावे, इ परमप्रभु ते बाक्म?' देशो बाक्तेक्म। गो मेको आन खतम दुम्शो ताइनुड। मुल यो मेकोपुकी लां डा हिलो खोदेशो पा दिम्चा पुंइसीशो बाक्नीम। भजन संग्रह ७९:१०

11 गे इन गारो लेंशा सेल्टीक नाक्त नु इन सांदपुकी डोन डोन सम्म चाक्दीत्तीक नाक्त जाक्शो बाक्ब।

12 मेको नाक्त अस्सुर नु इजीप्त रे शुश मुर जाक्नीम। इजीप्त रे युफ्रेटीस सम्म, समुन्द्र रे समुन्द्र सम्म नु पहाड रे पहाड सम्म डा शुश मुर इन बाक्तीक जाक्नीम।

13 तन्न रागी रागी नेल्ल श्येत्थ दुम्नीम। मुर आन मरिम्शो पशो आ पर्बम मोदेशो दुम्ब" देंत।

परमप्रभुम इस्राएल कली शिशी पाइब

14 गे इन मुर आन कली कोक्केम योव्रडीन। मेको ब्वाकीम बाक्शो बगाल इन के बाक्ब। मेको रिम्शो बाक्तीकेम बाक्नीम। मेको आन कली डोंइती डा खोदेशो पा बाशान नु गिलादमी जोचा गेन। मीका ५:३; येरमीया ५०:१९

15 गेपुकी इजीप्त रे गूशो नाक्त खोदेशो पा गो इन कली छक लाक्चा डा गेय कोंइनुड।

16 मेको रागी रागी डा मुरपुकी शुश सक्ति पाइश्शो बाक्तेक्म हना यो, मेको तशा, मुने दोक्नीम। मेकोपुकीम आन गुइम आन कुल सुम्सीनीम। मिनु मेको आन नोफा लाटा दुम्ब।

17 मेकोपुकीम बुस्स खोदेशो नु खपीम ग्रेशा गाक्ब जन्तु खोदेशो पा, खप तुक्नीम। मेको आन बोल्यो दरवार रे हिंशा ख्रिंख्रि

पा गूनीम। मेकोपुकी हिंशा परमप्रभु यावे, आंइ परमप्रभु गे लेत्नीम।
मिनु मेकोपुकीमी इन कली मान पा हिंनीम। भजन संग्रह ७२:९

18 इन खोदेशो परमप्रभु अर्को सु बाकबा डा? गे ठीक मपशो
क्याम्ब बाक्नीनी। इन लीशो मुर आन मरिम्शो पतीके माफ गेनीनी।
गे गेना हना यो गाइक्स डा गाइक्स मबाक्नीनी। तन्न शिशी पचा
कली ग्येरशा बाक्नीनी। भजन संग्रह १०३:३,८-१३

19 मेकोमी आंइ कली लेंशा शिशी पाइब। मेकोमी आंइ पाप कली
दिम्ब। गे आंइ पाप शुश लुकच लशो समुन्द्रमी ताइक्नीनी।

20 गे याकूब कली इन थमा सुइक्तीके कोइनीनी। मिनु अब्राहाम
कली दाक्शा मप्रोंइतीके कोइताक्नी। गे साइ डोंइती आंइ किकी
पिप आन कली कसम जशा लोत्र गेशो बाक्तीनी। उत्पत्ती २८:१३-
१५; उत्पत्ती २२:१६-१८; लूका १:७३

परमप्रभु यावे आ लोत्र

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

27cd6a1c-0244-5add-a4e8-b4f0e5104473